

Odluka o utvrđivanju tarife troškova arbitraže bih

I - OPŠTE ODREDBE

Član 1

Ovom odlukom određuje se visina troškova u postupcima pred Arbitražnim sudom pri Spoljnotrgovinskoj komori Bosne i Hercegovine (u daljem tekstu: Arbitraža).

Član 2

Stranke koje učestvuju u postupku pred Arbitražom snose troškove postupka.

Tužilac je dužan da prilikom podnošenja tužbe, odnosno protivtužbe u korist Arbitraže uplati iznos u granicama utvrđenim ovom odlukom, a radi podmirenja troškova postupka. Ako tužilac, odnosno protivtužilac u roku od 15 (petnaest) dana po prijemu poziva ne uplati troškove, smatraće se da je tužba, odnosno protivtužba povučena.

Tužilac je dužan da na poziv Arbitraže, prilikom podnošenja tužbe ili naknadno u toku postupka, uplati iznos koji je veći od iznosa utvrđenog ovom odlukom ukoliko se utvrdi da uplaćeni iznos neće biti dovoljan za podmirenje troškova postupka. Odluku o plaćanju iznosa većeg od uplaćenog, odnosno utvrđenog ovom odlukom donosi predsjednik Arbitraže, na prijedlog arbitražnog vijeća, odnosno arbitra pojedinca.

Član 3

Pored plaćanja naknade iz člana 2. st. (2) i (3) ove odluke, stranke su dužne da Arbitraži posebno naknade troškove:

izvođenja dokaza,
vođenja stenografskih bilježaka, odnosno zapisnika o izvođenju dokaza,
sačinjavanja transkripta zapisnika,
prevođenja podnesaka, isprava ili usmene rasprave,
održavanja ročišta van sjedišta Arbitraže,
dolaska i boravka arbitara koje su izabrale, a koji ne žive u mjestu sjedišta Arbitraže,
dolaska i boravka arbitra koje je izabrao predsjednik Arbitraže, a koji ne živi u mjestu sjedišta Arbitraže.

Član 4

Troškove izvođenja dokaza dužna je da naknadi ona stranka koja ih je i predložila.

Ukoliko izvođenje dokaza predlože obje stranke, tada troškove izvođenja dokaza naknađuju obje stranke ravnopravno.

Za pokriće izdataka prouzrokovanih procesnim radnjama koje je naredilo arbitražno vijeće, odnosno arbitar pojedinac po svojoj inicijativi, rješenjem vijeća, odnosno arbitra pojedinca određuje se koja će stranka položiti potreban iznos.

Član 5

Troškove vođenja stenografskih bilježaka, odnosno zapisnika o izvođenju dokaza snosi stranka koja ih je predložila.

Ukoliko su izvođenje dokaza predložile obje stranke, ravnopravno snose troškove vođenja stenografskih bilježaka, odnosno zapisnika o izvođenju dokaza.

Ukoliko je izvođenje dokaza predložilo arbitražno vijeće, odnosno arbitar pojedinac, rješenjem vijeća, odnosno arbitra pojedinca određuje se koja će stranka položiti potreban iznos.

Član 6

Troškove sačinjavanja transkripta zapisnika, u pravilu, naknađuju obje stranke ravnopravno.

Član 7

Ukoliko arbitražno vijeće, odnosno arbitar pojedinac održi ročište van stalnog sjedišta Arbitraže, predsjednik Arbitraže određuje naknadni iznos iz kojeg će se pokriti troškovi održavanja ročišta.

Ukoliko se ročište van stalnog sjedišta Arbitraže održi na prijedlog jedne od stranaka, naknadni iznos polaže stranka koja je prijedlog dala.

Ukoliko se ročište van stalnog sjedišta Arbitraže održi po zajedničkom sporazumu stranaka, svaka stranka polaže polovinu naknadnog iznosa.

Član 8

Stranka koja je izabrala arbitra koji nema prebivalište u sjedištu Arbitraže dužna je da Arbitraži naknadi iznos potreban za pokriće njegovih putnih troškova, dnevnica, kao i izgubljene plate tog arbitra.

Iznos potreban za pokriće putnih troškova, dnevnica i izgubljene plate arbitra koji nema prebivalište u sjedištu Arbitraže kojeg je izabrao predsjednik Arbitraže naknađuju obje stranke ravnopravno.

Putni troškovi, smještaj i dnevnice arbitra iz st. (1) i (2) ovog člana utvrđuju se u skladu sa važećim Pravilnikom koji reguliše ovu materiju, odnosno postojećim zakonskim propisima.

Član 9

Stranka, odnosno stranke koje su dužne da naknade posebne troškove iz ove odluke su na poziv sekretara Arbitraže dužne da u korist Arbitraže polože predumjam za podmirenje tih troškova.

Član 10

Prilikom podnošenja prijedloga za pokretanje postupka mirenja, lice koja ga predlaže dužno je da naknadi troškove utvrđene ovom odlukom. Na utvrđivanje visine naknade radi posredovanja, kao i svih drugih troškova koji mogu time biti izazvani primjenjuju se odgovarajuće odredbe ove odluke.

Na prijedlog sekretara Arbitraže, predsjednik Arbitraže može da odluči da se predlagaču posredovanja radi mirenja vrati dio iznosa uplaćenog u skladu sa odredbama stava (1) ovog člana.

II - TARIFA

Član 11

Prilikom podnošenja tužbe, odnosno protivtužbe, prijedloga za pokretanje postupka mirenja ili prijedloga za određivanje privremene mjere, stranka - podnosilac dužna je uplatiti Sekretarijatu Arbitraže iznos od 500,00 KM na ime takse za pokretanje postupka.

Član 12

Za sprovođenje postupka mirenja i arbitražnog postupka pred Arbitražom, na ime administrativnih troškova, plaća se:

iznos od 800,00 KM za vrijednost spora do 50.000,00 KM ukoliko obje stranke imaju sjedište, odnosno prebivalište na teritoriji BiH,

iznos od 1.200,00 KM za vrijednost spora do 50.000,00 KM ukoliko najmanje jedna od stranaka ima sjedište, odnosno prebivalište na teritoriji druge države,

iznos od 60% honorara arbitra za vrijednost spora preko 50.000,00 KM.

Član 13

Arbitri imaju pravo na honorar prema sljedećoj tabeli:

Vrijednost predmeta spora (od - do) u KM Honorar arbitra - bruto iznos u KM

od - A do - B C

50.000,00 1.500,00

50.001,00 100.000,00 3.500,00

100.001,00 200.000,00 6.000,00

200.001,00 500.000,00 8.000,00

500.001,00 1.000.000,00 12.500,00

1.000.001,00 2.000.000,00 16.000,00

2.000.001,00 naviše 22.000,00

Član 14

(1) Honorar arbitrima podrazumijeva iznos koji se plaća arbitrima za njihov rad, s tim da se u slučaju kada odlučuje arbitražno vijeće iznos iz tabele iz prethodnog člana množi brojem arbitara.

(2) Honorar predsjednika arbitražnog vijeća i honorar arbitra pojedinca uvećava se za 20% u odnosu na iznos utvrđen za arbitre.

Član 15

U naročito složenim slučajevima, kao i u slučajevima kada je prvobitno određen iznos nedovoljan, predsjednik Arbitraže može da odluči da se iznosi utvrđeni u čl. 12. i 13. ove odluke uvećaju do 20%.

Član 16

(1) U slučaju povlačenja tužbe, tužilac ima pravo na povrat dijela uplaćenih sredstava iz člana 12., odnosno člana 13. ove odluke, o čemu odluku donosi predsjednik Arbitraže, i to:

prije imenovanja arbitražnog vijeća, odnosno arbitra pojedinca – najviše do 30%,

prije zakazane usmene rasprave – najviše do 20%,

po zakazanoj raspravi, ali prije održane usmene rasprave – najviše do 15%.

(2) Po održanoj usmenoj raspravi navedena sredstva se ne vraćaju.

Član 17

Iznos uplaćen na ime takse iz člana 11. ove odluke se ne vraća.

Član 18

Stupanjem na snagu ove odluke prestaje da važi Odluka o utvrđivanju tarife troškova arbitraže (prečišćeni tekst), broj: VTK-2-1481-1-1/13 od 16. 8. 2013. godine.

Član 19

Na sporove započete prije stupanja na snagu ove odluke primjenjivaće se odredbe Odluke o utvrđivanju tarife troškova arbitraže (prečišćeni tekst), broj: VTK-2-1481-1-1/13 od 16. 8. 2013. godine.

Član 20

Ova odluka stupa na snagu osmog dana od dana objavljivanja u "Službenom glasniku BiH".